

ISU COVID-19 DALAM KANDUNGAN CERAMAH AGAMA PENDAKWAH MALAYSIA DI YOUTUBE

Burhanuddin Jalal, Amnah Saayah Ismail, Sayuti Ab Ghani, Muntaha Hj Salleh &
Ezad Azraai Jamsari

Abstrak

Dakwah berkait rapat dengan komunikasi. Secara praktiknya dakwah ialah proses mengajak manusia supaya mengamalkan ajaran Islam dengan melakukan pengabdian yang tulus kepada Allah SWT dan menuruti sunnah nabi Muhammad berteraskan al-Quran dan al-hadis. Penulisan ini akan membincangkan kandungan ceramah para pendakwah di Malaysia menerusi YouTube khususnya bertemakan isu COVID-19 dalam tempoh Perintah Kawalan Pergerakan di Malaysia sebagai usaha mengekang penularan pandemik COVID-19 di Malaysia. Penulisan ini menggunakan analisis kandungan YouTube terpilih dan juga kajian perpustakaan yang bertujuan untuk mengungkap mesej dakwah dalam tempoh pandemik COVID-19 di Malaysia. Penulisan ini menganalisis lima kandungan ceramah dari penceramah-penceramah agama di Malaysia di YouTube iaitu Syed Norhisham bin Tuan Padang, Ustaz Azhar Idrus, Ustaz Kazim Elias, Ustaz Don Danial Don Biyajid, dan Dr. Danial Zainal Abidin. Data penyelidikan berasaskan ceramah di YouTube mengenai mesej dakwah pandemik COVID-19. Dapatan kajian mendapati bahawa terdapatnya pelbagai tema dan isu kandungan dalam menyampaikan mesej berkaitan COVID-19 atau wabak penyakit dalam Islam serta pendekatan pendakwah yang pelbagai dalam menyampaikan ilmu Islam, melalui pendekatan amar makruf nahi mungkar (mengajak kebaikan dan mencegah kemungkaran), basirah (berdasarkan hujah dan ilmu), busra dan indhar (khabar gembira dan nikmat Allah) zikrullah (peringatan dan keyakinan kepada Allah dan juga pendekatan targhib dan tarhib (pujukan dan penggerunan). Secara umumnya dakwah dapat disampaikan menerusi teknologi dan matlamat utama ialah untuk mengubah fikiran, sikap, tingkah laku dan kepercayaan yang berteraskan iman dan tauhid kepada Allah SWT.

Kata Kunci: Dakwah, nilai, teknologi, COVID-19, komunikasi

PENDAHULUAN

COVID-19 (*Corona Virus Disease*) merupakan pandemik yang sedang melanda seluruh dunia. Virus yang pertama kali dapat dikesan di Wuhan, China pada akhir Disember 2019. Virus ini telah merebak dengan cepat ke seluruh dunia dan Malaysia turut terkesan dengan pandemik ini. Kehadiran pandemik ini menyebabkan seluruh penduduk dunia mengurangkan pelbagai aktiviti kehidupan seharian sama ada dari ekonomi, politik dan juga sosial.

Pandemik yang telah mengorbankan banyak nyawa, dan salah satu pendekatan oleh pihak berkuasa negara dengan mengarahkan rakyat agar tidak keluar dari rumah, tidak berkumpul dalam jumlah yang ramai dan tempat ibadah juga di

arahkan untuk menghadkan aktiviti pada mengelakkan pandemik merebak dengan cepat. Dalam hal ini pihak kerajaan telah melaksanakan Perintah kawalan Pergerakan (PKP) mulai 18 Mac 2020 yang lalu dan kini masih pihak kerajaan masih mengenakan Perintah kawalan Pergerakan Pemulihan sehingga 31 Disember 2020.

Dalam hal ini para pendakwah turut berperanan dalam menyampaikan pesanan dan nasihat bagi mengingatkan umat Islam agar dapat menjaga kesihatan dan memastikan tidak terkena dengan pandemik yang boleh meragut nyawa ini. Secara umumnya wabak atau pandemik Covid-19 ini telah mewujudkan rasa kekhuatiran, keresahan atau keadaan atau kekuatan yang melampau (panic), namun kita perlu yakin bahawa Allah sentiasa membantu dan menolong umatnya yang sentiasa patuh dan reda atas segala ketetapan dan ujian yang diberikan ini seperti mana ingatan dan firman Allah dalam surah Syarh ayat 3 hingga 8 yang bermaksud, *“Oleh itu, maka (tetapkan lah kepercayaan mu) bahawa sesungguhnya tiap-tiap kesukaran disertai kemudahan, Sekali lagi ditegaskan): bahawa sesungguhnya tiap-tiap kesukaran disertai kemudahan. Kemudian apabila engkau telah selesai (daripada sesuatu amal soleh), maka bersungguh-sungguh lah engkau berusaha (mengerjakan amal soleh yang lain), Dan kepada Tuhan mu sahaja hendaklah engkau memohon (apa yang engkau gemar dan ingini)”*.

Kita sebagai umat Islam perlu meyakini bahawa setiap ujian yang diberikan oleh Allah mempunyai peringatan untuk manusia seluruhnya. Pandemik Covid-19 yang menyerang hampir 200 buah negara di dunia, tentunya menuntut semua pihak untuk bermuhasabah atau memeriksa diri masing-masing terhadap segala amalan, perbuatan, sikap, dasar serta apa sahaja yang telah dilakukan selama ini yang bersifat kezaliman, kekejaman, kerosakan, penindasan, ketidakadilan atau apa sahaja yang bertentangan dengan perintah Allah. Menjadi harapan kita bersama agar wabak COVID-19 ini lebih mendekatkan diri kita dengan Allah SWT dengan lebih untuk melakukan taubat dan memohon keampunan khususnya dari melakukan kezaliman, kerosakan dan kemusnahan yang banyak sekali dilakukan oleh manusia dalam kehidupan.

Dalam suasana begini, para pendakwah atau para penggerak agama yang selama ini aktif dalam berdakwah, cergas dalam membantu masyarakat, banyak memberikan syarahan, berceramah dan sebagainya, menjadi harapan bersama agar kumpulan ini tidak larut atau leka dengan keadaan yang berlaku atau turut larut dengan suasana persekitaran. Maksudnya dalam tempoh begini kita perlu memperkuatkan diri dan keluarga dengan kekuatan keimanan serta hias rumah kita dengan cahaya amal soleh.

Namun demikian, kita jangan lupa bahawa di bahu para pendakwah terdapat amanah yang perlu diteruskan iaitu menyeru manusia untuk terus sedar supaya kembali taat kepada Allah dan patuh kepada jalan yang diredai. Para pendakwah

tidak mempunyai alasan untuk 'berehat' atau 'berlepas tangan' dengan alasan 'sedih', 'tidak berkeupayaan' atau 'keadaan tidak mengizinkan'. Dakwah perlu diteruskan, laksanakan terus usaha-usaha dakwah dan ambil lah setiap kesempatan untuk mengajak manusia ke arah kebaikan dan keinsafan serta taat kepada Allah.

Manfaatkan kemajuan teknologi yang ada serta kemudahan alat telekomunikasi yang ada termasuk aplikasi media sosial yang ada pada hari ini untuk merentasi pelbagai lapisan masyarakat dengan dakwah dan nilai Islam. Kemajuan teknologi yang ada perlu dijadikan wahana atau alat yang dapat menjadi penyambung pemahaman umat dan memberi kesedaran beragama kepada mereka. Keadaan badan atau fizikal mungkin berjarak tetapi pemikiran, pemahaman dan perasaan cintakan umat dan kasih sayang sesama insan perlu terus bertaut dalam kalangan masyarakat dan insan. Sesungguhnya masyarakat di luar sana memerlukan petunjuk dari pendakwah dan sentiasa menanti. Walau apa pun yang berlaku kita sentiasa menginsafi dan sentiasa menghayati firman Allah dalam surah al-Talak ayat 3 yang bermaksud, *"Sesungguhnya Allah melaksanakan urusan yang dikehendaki Nya. Sesungguhnya Allah telah mengadakan ketentuan bagi tiap-tiap sesuatu."*

METODOLOGI KAJIAN

Metodologi kajian ini menggunakan kaedah analisis kandungan YouTube terpilih serta kajian perpustakaan yang bertujuan untuk meneliti kandungan ceramah pada pendakwah Malaysia di YouTube, yang membincangkan kandungan ceramah mengandungi tema COVID-19. Dalam tulisan ini, analisis kandungan dilakukan Terhadap Lima Orang Penceramah Iaitu Syed Norhisham Tuan Padang, Ustaz Azhar Idrus, Ustaz Kazim Elias, Ustaz Don Danial Don Biyajid, dan Dr. Danial Zainal Abidin. Data Penyelidikan Berasaskan Ceramah Di YouTube Mengenai Mesej Dakwah Pandemik COVID-19. Dapatan Kajian Mendapati Bahawa Terdapatnya pelbagai tema dan isu kandungan dalam menyampaikan mesej berkaitan COVID-19 atau wabak penyakit dalam Islam serta pendekatan pendakwah yang pelbagai dalam menyampaikan ilmu Islam, melalui pendekatan *amar makruf nahi mungkar* (mengajak kebaikan dan mencegah kemungkaran), *basirah* (berdasarkan hujah dan ilmu), *busra* dan *indhhar* (khabar gembira dan nikmat Allah) *zikrullah* (peringatan dan keyakinan kepada Allah dan juga pendekatan *targhib* dan *tarhib* (pujukan dan penggerunan). Secara umumnya dakwah dapat disampaikan menerusi teknologi dan matlamat utama ialah untuk mengubah fikiran, sikap, tingkah laku dan kepercayaan yang berteraskan iman dan tauhid kepada Allah SWT.

Analisis kandungan YouTube dibuat terhadap lima penceramah dan maklumat tajuk ceramah, pautan, jumlah tontonan dan tarikh muat naik ceramah seperti maklumat dalam Jadual 1.

Jadual 1: Maklumat Penceramah, Tajuk. Pautan. Jumlah Tontonan

Penceramah		Tajuk	Jumlah tontonan	Link	Tarikh analisis
Syed Norhisham bin Tuan Padang		Covid-19 Bala atau ujian	62,644 (Muat Naik 27 Mac 2020)	https://www.youtube.com/watch?v=Zk6jsjj3Qug	10 Sept 2020
Ustaz Idrus	Azhar	Adakah Covid-19 bala dari Allah	62, 531 (Muat naik 24 Ogos 2020)	https://www.youtube.com/watch?v=ERDEtcjHDE0	2 Sept 2020
Ustaz Kazim Ilias	Ustaz	Corona Virus- Islam telah lama beri panduan lengkap	6,268 (Muat naik 2 Feb 2020)	https://www.youtube.com/watch?v=dnCGe4_S2as	3 Sept 2020
Ustaz Don Danial Biajid	Don	Apa kata Islam dengan penyakit	587, 687 (Muat naik 3 Feb 2020)	https://www.youtube.com/watch?v=kOMKyhRZ4Bk	6 Sept 2020
Ustaz Dr Danial Zainal Abidin		Apa itu COVID-19	3,170 (Muat naik 13 April 2020)	https://www.youtube.com/watch?v=uQaN9eF1pwY	8 Sept 2020

TEORI DAN KAJIAN LITERATUR

YouTube sebahagian dari komunikasi massa dan teori komunikasi massa yang sesuai digunakan untuk kajian ini ialah teori kegunaan dan pemuasan (*uses and gratification*). Teori ini mula diperkenalkan oleh J.G Blumer dan Elihu Katz (1994).


Teori ini menyatakan bahawa pengguna media berperanan aktif untuk memilih dan mengguna media tersebut, dengan kata lain pengguna media merupakan pihak yang aktif dalam proses komunikasi. Pengguna media berusaha mencari sumber media yang paling baik dalam memenuhi keperluan mereka. Ini juga bermaksud pengguna media mempunyai pilihan alternatif dalam memenuhi kepuasan dalam penggunaan media. Menurut Samsuddin A.Rahim (1993) terdapat lima aspek utama dalam penggunaan teori ini iaitu:

- a. Pengguna media berperanan penuh dalam pemulihan dan penggunaan media.
- b. Terbentuk inisiatif dalam mengaitkan kepuasan tertentu dalam khalayak terhadap pemilihan media yang diguna.
- c. Kompetensi dalam media massa untuk kepuasan keperluan yang lebih tinggi terdapat dalam perilaku khalayak dalam penggunaan media.
- d. Kepuasan untuk memilih media masa terdorong oleh pengaruh khalayak.
- e. Penilaian kepuasan penggunaan media hanya boleh dinilai oleh khalayak

Perlu di akui YouTube telah menjadi elemen penting dalam komunikasi massa dan penggunaan YouTube bukan sahaja dari aspek hiburan tetapi ia juga telah menjadi wahana tambahan untuk memperkaya maklumat serta pengetahuan khususnya generasi muda. Berdasarkan laporan Meyerson (2019) sejumlah 4.5 Juta YouTube ditonton dan sejumlah 72 jam durasi telah dimuatnaik di YouTube dalam tempoh satu minit. Berdasarkan kajian yang dibuat oleh Norizah Arifin (2019) terdapatnya video berkaitan asas Islam dalam YouTube dengan jumlah yang besar. Antaranya YouTube menggunakan kata kunci 'solat' (357,000 video), Syahadah (30,700), Puasa" (438,000 video), zakat (178,000 video) dan Haji (1,430,000 video). Kajian Shamsuddin A. Rahim dan lain-lain (2011) mengenai tahap akses dan penggunaan e-agama sebagai fenomena penglibatan digital dalam kalangan generasi muda Muslim yang melibatkan 932 remaja di Kuala Lumpur menunjukkan 93 peratus remaja memiliki akses internet di rumah mereka, tempat kerja, ataupun tempat mereka belajar. Ini menunjukkan remaja mampu dan boleh membuat akses terhadap bahan-bahan agama jika mereka mahu.

Sejarah YouTube bermula di Malaysia pada 22 Mac 2012 dan jumlah tontonan YouTube melebihi satu juta dengan purata tontonan 20 minit sehari (Zulkiple Abd Ghani 2019). Dalam hal ini Iovino (2011) menyatakan bahawa terdapat kelebihan tersendiri dalam penggunaan YouTube, namun terdapat beberapa persoalan yang masih belum terjawab mengenai cara generasi muda menggunakan teknologi tersebut. Secara umumnya perkembangan teknologi telah mengubah kredibiliti media itu sendiri. Pergantungan dan kepercayaan khalayak terhadap media atas talian, boleh dianggap bahawa penilaian kredibiliti media akan meningkat dan

penyertaan pendapat khalayak (Azmah Ab Wahab & Samsudin A. Rahim, 2013). Ini kerana media atas talian mempunyai pelbagai latar belakang khalayak. Misalnya media blog bukan sahaja terbatas kepada ahli politik atau wartawan amatir, tetapi juga bagi kalangan remaja yang beranggapan blog sebagai saluran menyuarakan pendapat serta berkomunikasi antara satu sama lain. Lambakan maklumat dalam talian ditambah dengan kebergantungan terhadap Internet dalam kalangan pencari maklumat, telah menimbulkan isu kredibiliti atau kualiti pemblog (Noor Azlin Bidin & Normah Mustaffa, 2012). Namun apa yang jelas YouTube merupakan media atas talian yang digunakan oleh generasi muda Islam untuk mencari maklumat agama. Penggunaan YouTube dan juga media-media lain amat besar sekali pada hari ini, dan tinjauan yang dibuat oleh gtbweb (2020) mendapati dapat tempoh 60 saat sahaja jumlah penggunaan media baru dapat ditunjukkan dalam rajah berikut,



Rajah 1: Penggunaan media sosial dalam tempoh 60 Saat pada tahun 2020

Sumber: <https://gtweb.co.uk/what-happens-every-60-seconds-online> (2020).

ANALISIS KANDUNGAN CERAMAH PENDAKWAH MALAYSIA DI YOUTUBE

a. Ustaz Syed Norshisam Tuan Padang - Tajuk ceramah ini ialah COVID-19: Bala atau Ujian?

Ustaz Syed Mohd Norhisam bin Tuan Padang, penceramah agama dari Terengganu. Mendapat pendidikan awal di Sekolah Kebangsaan Paloh, Kuala Terengganu, Sekolah Menengah Agama Sheikh Abdul Malek, Kuala Terengganu. Memperoleh diploma Syariah dari Kolej Ugama Sultan Zainal Abidin (KUSZA), Kuala Terengganu dan kemudian melanjutkan pengajian ke Universiti Sains dan Teknologi, Yamen di dalam Ijazah Pengajian Islam. Ceramah beliau boleh diikuti melalui pautan

<https://www.youtube.com/watch?v=Zk6jsjj3Qug> dan sehingga tarikh akses dibuat pada 10 September 2020, jumlah tontonan ialah seramai 62,644.

Dalam ceramah yang diberikan Ustaz Norhisham Tuan Padang telah menjelaskan hadis Nabi Muhammad SAW berkaitan wabak penyakit. Dalam hadis Nabi telah menyatakan bahawa apabila berhadapan dengan masalah penyakit berjangkit perkara awal yang perlu dilaksanakan ialah mengawal dari terus merebak serta tindakan pencegahan. Dari perspektif agama Islam, setiap individu dan ahli masyarakat untuk mengambil langkah-langkah pencegahan dan mengelakkan diri dari tempat-tempat awam, termasuk pihak pengurusan institusi masjid mengambil langkah agar orang yang sihat tidak dijangkiti penyakit, wabak atau pandemik yang melanda. Sabda Rasulullah SAW yang bermaksud, *'Orang yang sakit janganlah mendatangi yang sihat.'* (Hadis riwayat Imam Bukhari dan Imam Muslim). Nabi SAW. juga telah memerintahkan agar orang yang berada di tempat wabak untuk tidak keluar dari kawasanya dan yang sihat pula diperintahkan untuk tidak memasuki tempat yang terkena wabak.

Selanjutnya beliau juga mengulas Hadis nabi Muhammad SAW yang bermaksud, *"Daripada 'Aishah RA" Aku bertanya Rasulullah SAW mengenai (penyakit) taun. Baginda memberitahu kepadaku: "Sesungguhnya ia merupakan azab yang Allah hantar kepada sesiapa yang DIA kehendaki. Sesungguhnya ALLAH menjadikannya rahmat kepada orang-orang yang beriman. Tiada seorang pun yang berlaku taun (di tempatnya), lalu dia kekal berada di tempatnya -dalam riwayat al-Imam Ahmad: kekal berada dalam rumahnya- dalam keadaan sabar serta mengharap (pahala atau kesembuhan dari Allah) dengan dia percaya bahawa tidak menyimpannya melainkan apa yang Allah tetapkan untuknya, maka baginya seperti pahala seorang syahid".*

Daripada hadis ini dapat dijelaskan bahawa Islam turut mengambil langkah berlakunya sesuatu wabak atau penyakit dengan anjuran supaya ianya dirawat. Ini dapat dilihat berdasarkan beberapa dalil yang berkaitan dengan hal ini. Antaranya adalah seperti yang disebutkan di dalam sebuah hadis yang diriwayatkan oleh Usamah bin Syarik R.A beliau berkata bahawa Rasulullah SAW bersabda yang bermaksud, *Berubatlah kamu, sesungguhnya Allah S.W.T tidak menurunkan suatu penyakit melainkan diturunkan juga ubatnya melainkan satu penyakit sahaja, iaitu penyakit tua"*

Secara umumnya, perintah yang terdapat di dalam hadis ini menunjukkan bahawa berubat ini suatu yang disyariatkan dan hukumnya adalah *mustahab* (dituntut). Meskipun begitu, dalam beberapa keadaan tertentu hukum berubat boleh menjadi wajib sekiranya diketahui yang ia akan memberikan kebaikan dan jika diabaikan akan mendatangkan kemudaratan kepada pesakit. Demikian juga penyakit termasuk dalam perkara mudarat yang perlu dielakkan demi menjaga nyawa

seseorang manusia. Ini bertepatan dengan sebuah kaedah fiqah menyebut *'la darar wala dirar'* yang menekankan keperluan untuk menghilangkan dan menghapuskan semua kemudaratan yang diperakui syarak. Berdasarkan kaedah itu juga, orang Islam tidak dibenarkan melakukan sesuatu tindakan yang bukan sahaja membahayakan diri sendiri, bahkan mencetuskan kemudaratan kepada orang lain. Kaedah berkenaan dirumuskan berdasarkan perintah daripada Allah SWT seperti firman-Nya: *"Dan janganlah kamu berbuat kerosakan di bumi sesudah Allah menyediakan segala yang membawa kebaikan padanya."* (Al-A'raf: 56)

Larangan itu turut disebut dalam hadis yang diriwayatkan Sa'ad Ibnu Sinan al-Khudri RA bahawa Rasulullah SAW bersabda: Tidak boleh melakukan perbuatan yang mudarat dan tidak boleh memudaratkan orang lain. (HR Ibnu Majah). *Kesimpulannya* penceramah ini menekankan bahawa pada zaman nabi telah wujud wabak penyakit dan setiap insan, bertanggungjawab untuk menjaga diri untuk menghindarkan diri daripada dijangkiti oleh wabak penyakit seperti wabak Covid-19 yang sedang melanda seluruh dunia.

Jadual 2: Ceramah oleh Syed Norhisham bin Tuan Padang

Penceramah	Tajuk	Jumlah tontonan	Link	Tarikh analisis
Syed Norhisham bin Tuan Padang	Covid-19 atau ujian Bala	62,644 (Muat Naik 27 Mac 2020)	https://www.youtube.com/watch?v=Zk6jsjj3Qug	10 Sept 2020

b. Ustaz Azhar Idrus – tajuk ceramah 'Adakah COVID-19 bala dari Allah'

Ustaz dilahirkan pada 12 Februari 1962 di Kampung Ladang, Kuala Terengganu. Mendapat pendidikan awal di Sekolah Rendah Hj Mohd Sharif Alor Star Kedah, di peringkat menengah di Sekolah Menengah Sultan Sulaiman, Kuala Terengganu sehingga tingkatan enam. Mendapat pendidikan agama secara bertalaqqi dengan guru-guru pondok di sekitar Kuala Terengganu dalam ilmu Islam menerusi kitab-kitab jawi Melayu dan Arab yang muktabar dengan guru-guru pondok yang alim seperti Tuan Guru Haji Syed Mokhtar, Tuan Guru Mohd Tahir, Tuan Guru Mohd Hakim, Tuan Guru Haji Hashim, Tuan Guru Haji Ibrahim Mesir, Tuan Guru Muhammad Zubir dan Tuan Guru Haji Mohd Zin (Azhar Idrus 2011).

Pendekatan ceramah secara santai dan diselitkan dengan jenaka serta penggunaan loghat Terengganu amat menyenangkan para pendengar ceramahnya. Seringkali mengaitkan isu-isu agama dan kefahaman agama melalui

amalan masyarakat dan kaedah pembetulan serta penghayatan agama berdasarkan suasana masyarakat dan kemampuan masyarakat umum bagi membentuk kebaikan. Menerusi ceramahnya yang dianalisis yang bertajuk 'adakah COVID-19- Bala dari Allah? <http://www.youtube.com/watch?v=ERDEtcjHDE0>) telah mengingatkan bahawa manusia pada asasnya terdiri dari tiga unsur yang utama iaitu fizikal, akal dan roh. Aspek fizikal manusia boleh dipelajari dalam ilmu sains atau biologi, perubatan atau ilmu anatomi manusia, akal boleh diperdalam melalui ilmu pengetahuan dan aspek roh dikaitkan dengan aspek kerohanian atau spiritual.

Dalam menghadapi pandemik COVID-19 ini, usaha untuk menghindari pandemik ini melalui pendekatan ikhtiar secara fizikal dan spiritual dan kedua-duanya saling berkaitan:

- i. Ikhtiar secara fizikal dapat dilakukan dengan menjaga tingkah laku, amalan seharian, penjagaan kebersihan, makanan dan juga mematuhi peraturan SOP dan juga mengamalkan 3C seperti yang disarankan.
- ii. Ikhtiar roh – setiap individu Muslim perlu meningkatkan amalan ibadah kepada Allah seperti solat, puasa, zakat serta amalan selawat dan juga membaca a-Quran.

Ustaz Azhar Idrus telah menceritakan situasi umat Islam ketika berada dalam wabak bencana COVID-19 yang mana umat Islam tidak dapat menunaikan solat fardu secara berjemaah di masjid. Jadi bagaimanakah cara untuk umat Islam menghadapi hal tersebut? Maka Nabi SAW telah mengajarkan kepada umatnya dalam sabdanya yang bermaksud: "Rasulullah SAW pernah bersabda: Wabak taun adalah kotoran yang dikirimkan Allah SWT kepada sebahagian Bani Israil dan juga orang-orang sebelum kalian. Jika kalian mendengar ada wabak taun di suatu negeri, *janganlah kalian memasuki negeri tersebut. Namun, apabila wabak taun itu tersebar di negeri kalian, janganlah kalian keluar dari negeri kalian menghindari dari penyakit itu.*" (Hadis Riwayat Bukhari-Muslim)

Maksud hadis secara jelas memberitahu bahawa sekiranya seseorang itu mendengar di suatu tempat itu adanya penyakit taun atau penyakit berjangkit yang berbahaya, ia dilarang untuk memasuki kawasan tersebut. Manakala jika tempat yang didiami seseorang itu terjadinya wabak, maka janganlah ia keluar dari daerah tersebut. Hal inilah yang dilakukan oleh beberapa negara sekarang contohnya seperti Itali yang merupakan antara negara yang paling teruk dilanda wabak COVID-19.

Maka janganlah seseorang itu sengaja pergi ke negara tersebut atas hal yang tidak penting seperti melancong atau sebagainya. Manakala jika seseorang itu telah berada dalam kawasan daerah yang terkena wabak tersebut, maka janganlah

pulang atau keluar dari daerah tersebut. Kerana ianya dapat meningkatkan risiko jangkitan wabak penyakit berjangkit seperti COVID-19. Sekiranya mereka kembali ke tanah air, perlulah di kuarantin selama 14 hari sesuai aturan yang telah ditetapkan. Akan tetapi, ada sesetengah golongan manusia yang tidak patuh dengan SOP yang ditetapkan kerana beranggapan virus itu tidak perlu ditakuti kerana ianya hanyalah makhluk yang diciptakan oleh Allah SWT. Anggapan ini sangat-sangatlah tidak tepat dan selari dengan ajaran Rasulullah SAW sebagai hadis yang telah dinyatakan berikut yang bermaksud: *“Hindarilah orang-orang yang terkena judzam (kusta), sebagaimana engkau lari dari singa yang buas”* (HR. Bukhari) Jadi perbuatan melarikan dan menyelamatkan diri dari penyakit tersebut bukanlah bermaksud seseorang Muslim itu lari dari takdir melainkan sesuatu yang dituntut oleh maqasid Syariah.

Selain dari itu Ustaz Azhar Idrus menekankan Umat Islam hendaklah sentiasa bertawakal kepada Allah SWT dan mengikuti sunnah-sunnah yang telah diajarkan oleh Baginda SAW serta umat Islam jangan bersangka buruk dengan majlis fatwa alim ulama kerana mereka lebih mempunyai ilmu dalam membuat keputusan menutup masjid ketika terjadinya wabak. Hal ini kerana Islam itu bersifat menjaga nyawa umatnya.

Jadual 3: Ceramah oleh Ustaz Azhar Idrus

Penceramah	Tajuk	Jumlah tontonan	Link	Tarikh analisis
Ustaz Azhar Idrus	Adakah Covid-19 bala dari Allah	62, 531 (muat naik 24 Ogos 2020)	https://www.youtube.com/watch?v=ERDEtcjHDE0	2 Sept 2020

c. Ustaz Kazim Elias – tajuk ceramah ‘Corona Virus- Islam telah lama beri panduan lengkap

Ustaz Mohammad Kazim Bin Elias dilahirkan di Kampung Paya, Batu Kurau, daerah Selama, Perak pada 28 November 1972. Beliau merupakan anak ke-7 dari 9 adik-beradik kepada pasangan Elias Bin Che Mat dan Nazirah Binti Ismail iaitu seorang guru agama di sekolah di Batu Kurau. Bapanya juga seorang guru agama meninggal dunia ketika beliau berusia 8 bulan. Minat beliau yang mendalam di dalam bidang agama, beliau telah memohon dan berjaya memasuki Sekolah Agama Syubbaniah, Batu Kurau selepas tingkatan 5 dan menduduki Sijil Pelajaran Malaysia. Beliau kemudian menyambung pembelajarannya di Maahad Tahfiz al-Quran & Qiraat Negeri Perak di Masjid Negeri Perak sehingga mendapat Diploma Tahfiz Al Quran (Kazim Elias 2018).

Mula berdakwah pada awal tahun 1990 secara kecil-kecilan di surau-surau dan madrasah, namun kegiatan dakwahnya mula mendapat sambutan yang luas apabila menubuhkan sebuah pusat dakwah yang diberi nama Sedaya Irham pada tahun 2001. Dalam ceramahnya menekankan tentang kepentingan setiap individu Muslim perlu bijak dalam menangani pandemik COVID-19. Selain dari mematuhi arahan pihak berkuasa dengan mematuhi prosedur arahan tetap atau SOP (standard operation procedure) sebagai ikhtiar awal menjauhi pandemik ini, setiap insan Muslim juga perlu menjaga aspek hati atau batiniah dan juga menjaga aspek perilaku lahiriah selain dari bertawakal kepada Allah.

Setiap individu Muslim perlu sentiasa dekat dengan Allah SWT serta sentiasa memohon perlindungan dari-Nya. Setiap insan Muslim hatinya perlu yakin kepada Allah dan begitu juga dengan aspek kesihatan, ajal dan maut semuanya datang dari Allah. Dalam menghadapi situasi COVID-19 ini setiap individu Muslim disarankan untuk melakukan perkara berikut:

- i. Memperbanyakkan istiqfar atau memohon keampunan kepada Allah.
- ii. Memperbanyakkan membaca al-Quran
- iii. Memperbanyakkan selawat ke atas nabi
- iv. Memperbanyakkan sedekah
- v. Meninggalkan perkara-perkara maksiat dalam kehidupan seharian.

Pada pandangan beliau, penyakit ini adalah datang daripada makan makanan yang pelik. Sebagai contoh di Wuhan, China terdapat pasar yang menjual pelbagai binatang eksotik. Hasil daripada makan pemakanan yang pelik-pelik telah melahirkan penyakit yang pelik sebagai bala daripada Allah. Beliau juga telah mengaitkan bahawa wabak yang muncul ini merupakan petanda bahawa dunia makin sampai ke penghujung. Beliau telah mentakrifkan wabak ini sebagai musibah. Setiap perkara yang berlaku ada hikmahnya. Dan setiap perkara yang berlaku adalah dengan izin Allah S.W.T. Setiap ujian yang Allah berikan kepada manusia adalah untuk meningkatkan keimanan seseorang manusia. Jika musibah itu adalah sakit, orang salaful soleh rasa mulia bila mendapatkannya. Hal ini adalah kerana, orang yang sakit, Allah akan gugurkan sakitnya dan diampunkan sakitnya. Tambahan lagi, doa orang yang sakit adalah mustajab kerana dosanya gugur.

Terdapat juga musibah dalam bentuk bala. Bala ini turun adalah kerana supaya seorang insan tersebut hukumannya menjadi separuh dan separuh lagi dihabiskan di akhirat kelak. Seterusnya, beliau memasuki perbincangan wabak, setiap wabak mempunyai mesti ada penyebab berlakunya wabak tersebut. Terdapat ulama mengatakan bahawa, ketika keadaan darurat seorang yang sihat

boleh duduk sekali dengan seorang yang mempunyai penyakit berjangkit dengan syarat menyerah diri kepada Allah.

Pengajaran yang boleh didapati adalah, kita hendaklah sentiasa bersyukur dan tidak merungut atas ujian yang diberikan kepada kita kerana setiap yang berlaku ada hikmahnya. Selain itu, kita mestilah sentiasa bersabar dalam apa jua ujian yang dihadapi. Kesan terhadap ceramah yang boleh didapati adalah kita mengetahui perlunya pengasingan antara orang yang sihat dan yang berpenyakit berjangkit tidak kira mereka adalah ahli keluarga mahupun tidak. Tambahan lagi, semua orang sedar bahawa tidak boleh mementingkan diri sendiri ketika di dalam keadaan darurat sebegini. Kesimpulannya, semua pihak haruslah berganding bahu dan memberi kerjasama, dalam membendung penyakit berjangkit ini daripada menular dengan lebih teruk lagi. Sikap pentingkan diri akan memburukkan lagi keadaan di mana seterusnya membahayakan semua kehidupan.

Jadual 3: Ceramah oleh Ustaz Azhar Idrus

Penceramah		Tajuk		Jumlah tontonan	Link	Tarikh analisis
Ustaz Kazim Ilias	Ustaz	Corona Virus- Islam telah lama beri panduan lengkap	Virus- panduan	6,268 (muat naik Feb 2020)	2 https://www.youtube.com/watch?v=dnCGe4_S2as	3 Sept 2020

d. Ustaz Don Danial Don Biajid – tajuk ceramah ‘Apa kata Islam dengan penyakit Corona Virus

Ustaz Don Danial Pendakwah dan juga pensyarah di Kolej Islam Antarabangsa Selangor. Dalam menghadapi situasi COVID-19 ini, setiap individu Muslim perlu berpegang teguh kepada Islam dan terus yakin kepada Allah dan sentiasa mengharap pertolongan dari Allah dalam menghadapi musibah dengan pendekatan berikut:

- a. Meningkatkan rasa tawakal kepada Allah
- b. Melaksanakan semua perintah Allah dan menjauhi segala larangannya.
- c. Sentiasa berusaha dengan melakukan ikhtiar bagi menghindari dari jangkitan penyakit yang sedang melanda.
- d. Jangan terpengaruh dengan berita-berita palsu atau menyebarkan berita palsu yang berkaitan dengan wabak atau pandemik COVID-19

atau terleka dengan pelbagai berita yang terdapat dalam media sosial hari ini.

e. Waspada terhadap musibah yang lebih besar dari pandemik COVID-19.

Selanjutnya dalam ceramah Ustaz Don Danial turut menekankan perkara-perkara berikut berkaitan dengan COVID-19 iaitu:

Pertama: Ujian Pasti Mendatang. Allah akan memberi ujian terhadap umatnya dan salah satu ujian ialah penyakit. Ini berdasarkan firman Allah dalam surah al-Baqarah ayat 155-156 yang bermaksud, *"Demi sesungguhnya Kami akan menguji kamu dengan sedikit perasaan takut (kepada musuh) dan (dengan merasai) kelaparan dan (dengan berlakunya) kekurangan dari harta benda dan jiwa serta hasil tanaman. Dan berilah khabar gembira kepada orang-orang yang sabar – (Iaitu) orang-orang yang apabila mereka di timpa oleh sesuatu musibah (kesusahan) mereka mengucapkan: "Sesungguhnya kami adalah kepunyaan Allah dan kepada Allah jualah kami kembali".*

Menurut beliau, Allah S.W.T memberi khabar bahawa Dia menguji hamba-hambanya yang beriman dengan beberapa ujian di saat mereka berada dalam keadaan suka dan duka, dan kesemua mereka akan mendapat pahala jika mereka bersabar terhadapnya. Mereka kemudiannya mengucapkan lafaz istirja' bukti sebagai seorang yang sabar dan syukur. Justeru, senjata yang ampuh bagi umat Islam adalah sentiasa berhati-hati, menggunakan kebijaksanaan untuk mengatasi rintangan dan cabaran, di samping doa dan tawakkal kepada-Nya.

Kedua: Mengucapkan Istirja'. Berdasarkan petunjuk yang telah diberikan melalui wahyu yang mana apabila berlakunya musibah (kematian) maka antara ciri-ciri mereka yang bersabar dengan musibah tersebut adalah mereka mengucapkan istirja' iaitu ucapan yang maksudnya: *"Sesungguhnya kami adalah kepunyaan Allah dan kepada Allah jualah kami kembali".*

Ketiga: Jangan Sesekali Menakutkan Dengan Hebahan Yang Tidak Tepat. Setiap individu Muslim perlu berhati-hati dalam aspek penyebaran maklumat yang urang tepat khususnya melalui media sosial. Beliau telah menyebut Firman Allah SWT yang bermaksud, *"Dan apabila datang kepada mereka sesuatu berita mengenai keamanan atau kecemasan, mereka terus menghebahkannya; padahal kalau mereka kembalikan sahaja hal itu kepada Rasulullah dan kepada - "Ulil-Amri" (orang-orang yang berkuasa) di antara mereka,*

tentulah hal itu dapat diketahui oleh orang-orang yang layak mengambil keputusan mengenainya di antara mereka; dan jika tidaklah kerana limpah kurnia Allah dan belas kasihanNya kepada kamu, tentulah kamu (terbabas) menurut Syaitan kecuali sedikit sahaja (iaitu orang-orang yang teguh imannya dan luas ilmunya di antara kamu). (Surah al-Nisa: 83). Perkara ini bertepatan dengan hadis daripada Ibn Umar R.Anhuma, bahawa Nabi SAW bersabda yang bermaksud, *“Sesiapa yang membawa senjata untuk menakut-nakutkan kami, maka dia bukan daripada kalangan kami.* (Riwayat al-Bukhari, no. 6874). Termasuk juga dalam erti kata menakutkan orang adalah dengan maklumat palsu yang menjadikan masyarakat merasa panik, takut dan bimbang. Begitu juga sebaran maklumat yang menggerunkan tanpa usul periksa sedangkan hakikat sebenarnya adalah berlainan.

Keempat: Mengambil Asbab Kerana Ia Termasuk Dalam Hakikat Tawakal. Menjadi sunnatullah agar kita berusaha dan mencari sebab bagi melaksanakan sesuatu atau mengenal sebarang bentuk penyakit seterusnya dengan itu dapat mencari ramuan serta rawatan untuk penyakit tersebut. Benarlah hadith Nabi SAW Daripada Abi al-Darda' RA, bahawa Nabi SAW bersabda yang bermaksud: *“Sesungguhnya Allah SWT menurunkan penyakit dan penawarnya. Dia jadikan setiap penyakit ada penawarnya. Maka hendaklah kamu berusaha merawat tetapi jangan merawat dengan bahan yang haram.”* (Riwayat Abu Daud, no. 3874).

Kelima: Memahami Nas Dengan Sebaiknya. Sebagai orang Islam yang beriman, kita perlu mencari dan mempunyai ilmu dalam konteks ilmu kesihatan atau penyakit. Daripada Abu Hurairah RA bahawa Rasulullah SAW bersabda yang bermaksud, *“Tidak ada penyakit yang berjangkit.”* (Riwayat al-Bukhari, no. 5770). Apa yang dimaksudkan oleh Rasulullah SAW ialah tidak boleh membiarkan penyakit menjangkit, membiak, menjalar, menular dan merebak.

Jadual 4: Ceramah oleh Ustaz Don Danial Don Biajid

Penceramah	Tajuk	Jumlah tontonan	Link	Tarikh analisis
Ustaz Don Danial Don Biajid	Apa kata Islam dengan penyakit	587, 687 (Muat naik 3 Feb 2020)	https://www.youtube.com/watch?v=kOMKyhRZ4Bk	6 Sept 2020

e. Ustaz Dr Danial Zainal Abidin – Tajuk Ceramah ‘COVID-19’

Dr. Danial bin Zainal Abidin berasal daripada Kampung Manggis, Sungai Ara, Pulau Pinang. Beliau merupakan anak kedua kepada Hj. Zainal Abidin bin Hasan dan Hj. Che Su bte Hj. Jamaluddin dan dilahirkan pada bulan 21 Julai, 1955. Mendapat pendidikan awal di Sekolah Rendah dan Sekolah Menengah Jelutong, Pulau Pinang. Selepas mendapat gred satu dalam peperiksaan MCE beliau memasuki tingkatan enam di Sekolah Menengah Penang Free sebelum ke Universiti Iskandariah, Mesir, untuk melanjutkan pelajaran dalam bidang perubatan (Danial Zainal Abidin 2011).

Dalam bidang penulisan, beliau merupakan kolumnis tetap ruangan Islam dan Sains bagi Majalah-i, Karangkrif, dan Kosmik, Dewan Bahasa dan Pustaka. Buku-buku yang telah beliau hasilkan setakat ini berjumlah sepuluh buah iaitu, Konsep Perubatan Islam, Islam The Misunderstood Religion, Bahan Berdakwah Untuk Remaja Moden, Kit Kombat Islam, Perubatan Islam dan Bukti Sains Moden, Bukti Sains dan Sejarah Kerasulan Nabi Muhammad SAW., Empayar Minda Muslim, 7 Formula Individu Cemerlang, Tip-tip Cemerlang Daripada Quran dan Quran Saintifik. Lima daripada buku-buku ini telah mencapai status terlaris atau bestseller di Malaysia. Buku Perubatan Islam dan Bukti Sains Moden pula menjadi Finalis dalam Anugerah Media Islam (AMIN) bagi tahun 2006. Setakat ini empat buah buku beliau telah dilesenkan untuk pasaran di Indonesia, iaitu, Empayar Minda Muslim, Perubatan Islam dan Bukti Sains Moden, 7 Formula Individu Cemerlang dan Tip-Tip Cemerlang Daripada Quran (Danial zainal Abidin 2003).

Beliau aktif berceramah dan pendidikan agama masa kini dan banyak syarahannya menggunakan kitab '*Asas al-tafsir*' karangan Said Hawa. Ceramah YouTube beliau mengenai tajuk COVID-19 ini telah dimuatnaik pada 13 April 2020 dan sehingga kini telah dilihat seramai 3,170 orang (<https://www.youtube.com/watch?v=uQaN9eF1pwY>).

Dr Danial dalam ceramahnya menjelaskan bahawa COVID-19 masih lagi mengenai perdebatan dalam kalangan ulama dan terdapat dalam kalangan orang-orang agama yang berpendapat bahawa penyakit ini merupakan satu musibah kepada umat. Dalam hal ini beliau telah menyorot dari aspek sejarah Islam, bahawa terdapat wabak penyakit yang menyerang negara Irak dan Syam setelah berlakunya perang Yarmuk. Penyakit tersebut dikenali sebagai penyakit taun dan ramai ulama mengaitkan peristiwa tersebut dengan COVID-19 pada hari ini. (<https://www.youtube.com/watch?v=uQaN9eF1pwY>).

Dr Danial juga menyorot pendapat yang disampaikan oleh Syeikh Prof Dr Abdul Razak Abdil Muhsin al-Al Abbad al-Badr pada 9 Mac 2020 yang menyorot tentang COVID-19 ini dengan menyatakan bahawa satu musibah yang ditakuti manusia

ialah virus yang boleh membinasakan. Bagi menghindari virus ini umat Islam perlu merujuk petunjuk al-Quran dan umat Islam akan mendapat jawapan tersebut. Antara lain petunjuk dari al-Quran menyatakan bahawa seseorang hamba itu tidak akan ditimpa sesuatu musibah kecuali dengan kuasa Allah jua. (<https://www.youtube.com/watch?v=uQaN9eF1pwY>).

Selain dari itu Dr. Danial juga menyentuh tentang faktor-faktor yang membawa kerosakan dan pencemaran dalam kehidupan dan aspek yang utama ialah kecenderungan manusia untuk melakukan pelbagai kerosakan dan pada hari ini juga manusia berlumba-lumba mendapatkan kesenangan dan kekayaan dunia dan tidak segan silu memusnahkan alam dengan cara penebangan hutan yang berleluasa, perlombongan yang berlebihan dan sebagainya. Ini menunjukkan manusia tidak mengambil berat terhadap ingatan Allah dalam al-Quran bahawa kerosakan di darat, laut adalah disebabkan oleh perbuatan manusia (surah al-Rum ayat 41. Oleh itu Allah SWT memberikan musibah COVID-19 sebagai peringatan dan teguran kepada manusia. (<https://www.youtube.com/watch?v=uQaN9eF1pwY>).

Sebelum itu Dr. Denial menerangkan sejarah awal merebaknya virus ini berdasarkan ulasan dari pihak Pertubuhan Kesihatan Sedunia (WHO), wabak coronavirus dikesan selepas organisasi itu dimaklumkan terdapat beberapa kes radang paru-paru di bandar Wuhan, di wilayah Hubei, China. WHO dalam laman sesawangnya berkata, pihak berkuasa China pada 7 Januari lalu mengesahkan Coronavirus yang baru dikenal pasti itu boleh tersebar daripada manusia kepada manusia. Virus itu tidak sepadan dengan virus lain yang diketahui, dan mencetuskan kebimbangan kerana tidak banyak yang diketahui mengenai virus ini seperti tahap bahayanya dan bagaimana kesan jangkitannya terhadap manusia. "Virus baru itu adalah coronavirus, yang merupakan keluarga yang termasuk selsema biasa, dan virus seperti Sars dan Mers," katanya. Virus baru ini buat sementara waktu dinamakan sebagai "2019-nCoV." Bagaimana Coronavirus memberi kesan kepada manusia? Menurut WHO, coronavirus adalah keluarga besar virus yang menyebabkan penyakit daripada selsema biasa kepada penyakit yang lebih berbahaya seperti sindrom pernafasan akut teruk (Sars) dan sindrom pernafasan Timur Tengah (Mers-CoV). "Tanda biasa jangkitan termasuk gejala pernafasan, demam, batuk, sesak nafas dan kesukaran bernafas. "Dalam kes yang lebih teruk, jangkitan boleh menyebabkan radang paru-paru, sindrom pernafasan akut yang teruk, kegagalan buah pinggang dan malahan membawa maut. (<https://www.youtube.com/watch?v=uQaN9eF1pwY>).

Jadual 5: Ceramah oleh Ustaz Dr Danial Zainal Abidin

Penceramah	Tajuk	Jumlah tontonan	Link	Tarikh analisis
Ustaz Dr Danial Zainal Abidin	Apa itu COVID-19	3,170 (Muat naik 13 April 2020)	https://www.youtube.com/watch?v=uQaN9eF1pwY	10 Sept 2020

PENDAKWAH SEBAGAI AGEN PERUBAH

Dalam konteks norma baru menjadi hadapan pendakwah juga dapat menjadi agen perubahan dalam masyarakat. Pendakwah sebagai berperanan menyampaikan pesanan dan nasihat dengan idea yang dilontarkan sehingga terdapat perubahan sikap atau pun pengukuhan terhadap sesuatu arahan (*reinforcement*). Peranan pendakwah sebagai agen-perubah masyarakat seperti yang disebutkan oleh Everent M. Rogers (2003) yang menyatakan, “*change agent seeks the influence the behavior of their client. The success of their efforts is measured in term of client awareness or motivations, persuasion, adaptation and reinforcement*”. Berdasarkan isi kandungan ceramah oleh empat tokoh pendakwah di Malaysia melalui YouTube berdasarkan analisis kandungan yang telah dilakukan, pendakwah mampu berperanan sebagai agen perubah masyarakat (*agent of change*) sekali gus mampu melakukan tujuh aspek berikut iaitu:

- Membangunkan keperluan untuk perubahan (*Develop a need for change*)
- Menjalin hubungan dengan masyarakat dalam tindakan perubahan (*Establish a change relationship*)
- Mengenal pasti masalah (*Diagnose problem*)
- Mencari tindakan alternatif dan inovasi (*Examine goals and alternative course of action, then create the intent into action that the client innovates*)
- Menstabilkan perubahan dan usaha untuk mengelakkan masalah berlanjutan (*Stabilize change and attempts to prevent discontinuous*)
- Mengukuh hubungan dengan masyarakat (*Achieve a terminal relationship*)

Selain dari itu penceramah agama berdasarkan ketokohan mereka dapat meningkatkan kewibawaan atau kredibiliti mereka seperti yang disebutkan oleh Everest M. Rogers, “*credibility is the degree to which a communication source or channel is perceived a trustworthy and competent by the receiver*”. (Everent M. Rogers 2003).

Kesimpulan

Secara umumnya pandemik COVID-19 telah memberikan impak yang sangat besar kepada sistem politik, ekonomi, sosial, kesihatan dan pendidikan negara.

Malah telah mengubah cara dan gaya hidup manusia termasuk cara kebanyakan individu bekerja, bersosial, belajar dan juga aktiviti kehidupan seharian.

Namun demikian, selain dari berusaha untuk mengatasi pandemik ini dengan pelbagai kaedah, kita perlu memahami hakikat Allah SWT sebagai Tuhan Pencipta dan hubungan sesama mereka iaitu Allah, manusia dan alam dari segi hak dan tanggungjawab masing-masing. Allah Maha Sempurna yang menciptakan manusia dan segala alam ini dengan penuh kesempurnaan. Oleh sebab Allah Maha Pengasih dan Penyayang, maka Allah juga mencipta alam ini dengan penuh kasih sayang. Begitu juga, oleh sebab Allah Maha Bijaksana, maka Allah SWT mencipta alam ini dengan serba kesempurnaan serta lengkap. Allah juga tahu segala kelemahan, kekurangan, keperluan dan kekuatan alam ini. Oleh yang demikian, Allah telah menurunkan peraturan untuk dipatuhi bagi memelihara alam ciptaan-Nya agar ekosistem alam ini dapat memberikan manfaat secara berterusan kepada seluruh manusia yang hidup bersamanya.

Manusia telah dijadikan sebagai makhluk yang paling mulia di dunia ini. Manusia mestilah menginsafi dirinya dan bersyukur atas nikmat kurniaan Allah SWT. Sebagai makhluk yang diangkat sebagai khalifah di muka bumi ini manusia diberikan mandat oleh Allah SWT untuk mentadbir, memerintah dan memakmurkan alam ini dengan baik tanpa mengeksploitasi alam ini secara melampau. Penciptaan alam semesta ini adalah untuk kemudahan dan kesenangan manusia dalam jangka panjang. Manusia memegang amanah untuk memanfaatkan dan memakmurkan alam semesta ini untuk kepentingan manusia untuk waktu sekarang dan masa depan. Keseimbangan alam dan manusia mesti dipelihara untuk kelestarian kehidupan dan kesejahteraan manusia.

Rujukan

- Azhar Idrus. (2011). *Anda bertanya, Ustaz Azhar Idrus menjawab*. Kuala Lumpur: PTS Islamika Publication.
- Danial Zainal Abidin. (2003). *Empayar minda Muslim: Modul tarbiah asas alaf ketiga*. Kuala Lumpur: PTS Publication
- Danial Zainal Abidin. (2011). *Persoalan Islam kontemporari*. Kuala Lumpur: PTS Publication.
- <https://gtweb.co.uk/what-happens-every-60-seconds-online> (2020) diakses pada 10 September 2020.
- https://www.youtube.com/watch?v=dnCGe4_S2as. Ustaz Kazim Ilias. Corona Virus- Islam telah lama beri panduan lengkap. Tarikh akses 8 Sept 2020.
- <https://www.youtube.com/watch?v=ERDEtcjHDE0>. Ustaz Azhar Idrus. Adakah Covid-19 bala dari Allah. Tarikh akses 2 Sept 2020.

<https://www.youtube.com/watch?v=uQaN9eF1pwY>. Us Dr Danial Zainal Abidin. Covid-19. 4 Sept 2020.

<https://www.youtube.com/watch?v=Zk6jsjj3Qug>. Syed Norhisham bin Tuan Padang. Covid-19 Bala atau ujian. Tarikh akses 10 Sept 2020.

Iovino, P. (2011). An estimation of the technology acceptance model and usage intensity on line network. Diakses pada 8 September 2020 <http://tesi.eprints.luiss.it/6080/1/iovino-tesi-2011.pdf>.

J.G Blumer dan Elihu Katz (1994). *The Uses of Mass Communication: Current Perspective On Gratification Research*. California: Sage Publication.

Kazim Elias. (2018). Air mata dakwah. Kuala Lumpur: Karya Bestari Publication House.

Meyerson, M. (2019). *Success secret of the social media marketing superstars*. USA: Entrepreneur Media Inc.

Noor Azlin Bidin dan Norman Mustaffa. (2012). Blogosphere: How youth perceived blogs credibility. *Jurnal Komunikasi; Malaysian Journal of Communication*, 28(1) pp 33-40.

Norizan Ariffin dan rakan-rakan. (2019). YouTube dan generasi muda Islam: satu pendekatan kelompok fokus pelajau universiti dalam, *Journal of communication* Jilid 32 (1) 2016: 371-400.

Rogers, E. M. (2003). *Diffusion of innovations* (5th ed.). New York, NY: Free Press.

Samsuddin A. Rahim, Nor Ba'ayah Abdul Kadir, wan Aminah Wan Mahmud. (2011). Media time vs active time: Leisure time among the youth. *International Journal of Human and Social Sciences*. 6(3): 153-156.

Samsuddin A. Rahim. (1993). *Komunikasi Asas*. Kuala Lumpur: Dewan Bahasa dan Pustaka.

Zulkiple Abd Ghani. 2019. *Eco Sistem Dakwah Dalam Era Digital*. Nilai: Penerbit Universiti Islam Malaysia.

Penulis:

Burhanuddin Jalal
Universiti Pertahanan Nasional Malaysia (UPNM)
emel: burhanuddin@upnm.edu.my

Amnah Saayah Ismail
Sayuti Ab Ghani
Muntaha Hj Salleh
Universiti Pertahanan Nasional Malaysia (UPNM)

Ezad Azraai Jamsari
Universiti Kebangsaan Malaysia (UKM)